



Газет  
1994 жылдың 15 сәуірінен  
бастап шығады

• Қалалық қоғамдық-саяси әлеуметтік-  
ақпараттық тарихи-танымдық газет •  
E-mail: [akmeshit.kz@mail.ru](mailto:akmeshit.kz@mail.ru)

### ҚАРАҒАНДЫ ҚАСІРЕТІ: САЛҒЫРТТЫҚТЫҢ САЛДАРЫ



Тағы да қаралы күн. Бейбіт елде көкке ұмтылып, желбіреген туымыз тағы да төмен түсті. Қазақ елінің басына кара бұлт үйірілген күн бұл. Басқа қалай айтамыз? Ел аман, жұрт тынышта жұмысқа кеткен қанша үйдің азаматы үйіне оралмады, келмесе кетті. Елдің қабырғасын қайыстырған қайғылы жағдай Қарағанды облысындағы Костенко шахтасында болған еді. Еңсені басқан төтенше жағдай айналасында сұрақ көп. Мұндай жағдай қашанғы жалғасады, неге немқұрайды қараймыз? Адамның амандығына, өндірістегі қауіпсіздікке неге салғырттық таныттық?..

28 қазан күні Костенко шахтасынан өрт шығып, адам өлімі болды. Сол кезде жарияланған алғашқы ақпараттарға сүйенсек, шахтада 252 адам болған, жер бетіне сол сәтте 205 шахтер шығарылған. 11 адам сол мезетте көз жұмған. Қарағанды облысы әкімінің басшылығымен жедел штаб құрылып, адамдарды аман сақтап қалуға бел шеше кіріскенімен, кеніште қаза болғандар саны арта берді.

Кеніштегі қайғылы жағдайға байланысты Мемлекет басшысы Қасым-Жомарт Тоқаев уақыт оздырмай шешім қабылдады. Президент тапсырмасымен оқиғаның мән-жайын анықтау үшін үкіметтік комиссия құрылды. Сонымен қатар Үкіметке «АрселорМиттал Теміртау» компаниясымен инвестициялық ынтымақтастықты тоқтатуды тапсырды.

2 БЕТТЕ

### «111»-ге ХАБАРЛАСАТЫНДАР КӨП ПЕ?

– Алло, сіз отбасы, әйелдер және балалар құқығы мәселелері жөніндегі «111» «Аманат» мемлекеттік сенім телефонына қоңырау шалып тұрсыз. Операторға қосылу үшін бірді басыңыз.

Содан соң өз мәселеніңізді айта аласыз. Иә, бұрын бұл нөмір «Аманат» партиясының жанынан жұмыс істесе, қазір 101, 102, 103 сынды нөмірлермен бірге мемлекеттік төтенше жағдайлар қызметінің бірыңғай тізіміне енді.

Бүгінде отбасында зорлық-зомбылыққа ұшырайтын әйелдер де, балалар саны да көбейіп барады. Статистикаға сүйенсек, еліміздегі дағдарыс орталықтарына хабарласып, көмек сұрағандардың 70 пайызы – балалар. Осы тұста бірқатар сұрақ туындайтыны анық. Жақын



адамдарынан зорлық-зомбылық көру олардың психологиясына қалай әсер етеді? Неге ана мен бала жиі зорлыққа ұшырайды? Зәбір көрген жандар қайда хабарласа алады?

Енді елімізде отбасы мүшелеріне, балалар мен әйелдерге арналған шұғыл қоңырау нөмірі пайда болды. Киын жағдайда қалған тұрғындар осы нөмірге тегін хабарласып, көмек ала алады. Бұл нөмір еліміздің барлық тұрғынына ақпараттық-анықтамалық, ұйымдастырушылық сипаттағы тегін байланыс қызметтерін, сондай-ақ психологиялық көмек көрсетуді, азаматтардың заңды құқықтарын қорғайтын барлық мәселелер бойынша бастапқы кеңес беруді қамтамасыз етеді.

4 БЕТТЕ

### Тарихы терең Тасбөгет

Қала іргесіндегі көненің көзіндей болған Тасбөгет кентін көрсек шежіре парақтарын ашып, өткен күндерге ойша шолу жасаймыз. Сондықтан кенттің тарихы жайлы бір-екі ауыз сөз қозғауды мақұл көрдік. Себебі жылдар белдеріндегі тарих өрнегін кейінгі ұрпаққа мұрағаттау, таныту – біздің борышымыз. Кезінде бөгетімен, аудан орталығы болған айшықты жылдарымен есте қалатын кенттің кейінге мирас етер жылнамасын біреу білсе, біреу білмеуі мүмкін.



3 БЕТТЕ

### СҰХБАТ

Мөлдір Жаңбырбай,  
әлем чемпионы:

### АЗИЯДА ЖІБЕРГЕН ЕСЕНІ ӘЛЕМ ЧЕМПИОНАТЫНДА ҚАЙТАРДЫМ



Күні кеше жер-жаһанды сүйіншілеген хабар жетті. Венгрияда өткен әлем чемпионатында қазақ қызы алтыннан алқа тақты. Сыр сұлуы Мөлдір Жаңбырбай қаратәден алтын алған алғашқы қазақ. Спортшымен аз-кем тілдескен едік.

– Азия ойындарында күміс еншіледіңіз. Десе де Сыр жұртшылығы үшін алтыннан кем емес жүлде болды. Себебі ақтық сайыстағы жеңіске ұмтылысыңыз көптің көңілінен шыққанын байқадық. Сіздің ойыңызша, алтын алуға не кедергі болды?

– Ел абыройын асқақтатып, көк байрақты көтеру – әрбір спортшы арманы. Соңғы бәсекеде бұл мақсатқа жету күрделі болғаны шындық. Дегенмен физикалық, психологиялық дайындықта еш мін жок. Жарыс алдындағы жаттығу, бапкерлер кеңесін пайдаға жаратуға

тырыстым. Окініштісі, нәтиже көңілден шықпады.

Ақтық сайысқа назар аударсаңыз, табанды белдемдік. «Алтын» алатыныма сенімді болып, қарсыласты әлсіретуге талпынғаным рас. Бірақ жарыс бітуіне соңғы минут қалғанда босансып, алтын қолдан кетті. Сондықтан бас жүлдеге илінбеуіме шектен тыс сенім кедергі болған секілді. Әйтпесе, қойылған тактика, күш пен мүмкіндікті есептеуден қате болмады. Қарсыласыммен де бұрын тартысты бәсекелерде кездесіп, басым түсіп жүргенмін. Бұйырмаған шығар деген ой бар.

4 БЕТТЕ

### МЕЗГІЛ МӘСЕЛЕСІ



Уақыт белдеуін өзгерту  
сан соқтырмай ма?

Осыдан бес жыл бұрын еліміздің Атырау, Ақтөбе, Қызылорда, Маңғыстау облыстары төртінші уақыт белдеуімен, ал өзге облыстар бесінші уақыт белдеуіне бағынып, сағат уақыты екі әкімшілік уақыт белдеуімен есептелген еді. Оған дейін жазғы және қысқы уақытты ғана білетін көпшілігіміз үшін бұл түсініксіз жағат болғаны рас. Тек уақыттың бір сағат кейін шегеріліп, таңымыздың әдеттегіден кеш ататынын, ұйқымыздың қанық болатынына қуанғанымыз жасырын емес.

Жақында әлеуметтік желілерде бір сағат уақыт айырмашылығы бар аймақтардың Астана уақытымен теңестірілетіні туралы ақпарат тарайды. Бұған қатысты Экология және табиғи ресурстар министрлігі еліміздің батыс өңірі биыл 30 қарашадан 1 желтоқсанға қараған түні елорда уақытына ауыстырылатынын мәлімдеді. Алайда қазіргі уақытта бұл мәселе зерттелу үстінде. Ел аумағындағы уақытты есептеудің бірыңғай тәртібін белгілеуде Экология және табиғи ресурстар министрлігі мен Сауда және интеграция министрлігі депутаттар мен орталық мемлекеттік органдардың, қоғам мен ғылыми ұйым өкілдерінен құралған жұмыс тобымен бірлесіп бұл мәселені зерделеуде.

### Уақыт белдеуі деген не?

Жер бетіндегі уақытты есептеу жүйесі адам өміріне қолайсыздық тудырмас үшін халықаралық келісім негізінде 24 сағаттық белдеуге бөлінген. Ал әр сағаттық белдеу Гринвич меридианынан бастап шығысқа қарай 15 градустан құралады. Осылайша 24 сағаттық белдеу 0 ден 23 ке дейін нөмірленіп, әр меридиандағы орынның өзінің жергілікті уақыты белгіленген. Қазіргі таңда елімізде осы жергілікті уақыттың бірыңғай тәртібін енгізу мәселесі қаралауда.

Жалпы мәселенің мән-жайын түсіну үшін белгілі бір терминдерді, оның мағынасы мен маңызын ұғыну қажет-ақ. Бұл тұрғыда уақыт белдеуінің тіршілік үшін қаншалықты маңызы барын зерттеп, зерделеп жүрген қолданбалы хронология маманы, ҚР Сауда және Интеграция министрлігі жанындағы Уақыт өлшемі тәртібін реттеу мәселелері бойынша ведомстволық топ мүшесі, «International Alliance for Natural Time»-ның Қазақстандағы өкілі Болат Нұрхожаев былайша түсіндіреді.

3 БЕТТЕ





